

*He kahupapa waka, he kaupapa whenua, whakaeke mai*

## ***Tauira Terenga Waka o Tuia 250***



## **Tiro Whānui o te Tono**

He tiro whānui o te tono mō ngā tūranga *Tauira*



## Kōrero Whakamahuki

I tēnei tau ka whakanuia e Aotearoa ngā tūtakitanga tuatahi o te Māori me te Pākehā 250 tau ki muri nei. He whakamaumaharatanga a *Tuia - Ngā Tūtakitanga 250 (Tuia 250)* mō te motu e tohu ana i tēnei wā i roto i ā tātau kōrero hītori, otirā i roto anō i te āhuatanga o ngā hekenga waka o ngā iwi o Te Moana-nui-a-Kiwa mai rā anō. He wā anō tēnei mō te whakawhitiwhiti kōrero, mō te tohe kaupapa, mō te whakaaro hoki mō ngā kōrero katoa mō ō tātau iwi i whai kāinga mai ki Aotearoa nei, Te Moana-nui-a-Kiwa mai, Māori mai, Pākehā mai, e mana ai te whakatāhuhu i ngā kōrero a tēnā, a tēnā i roto i te wharekōrero nui o te motu. Kāti ko tā *Tuia 250* he whītiki hoki te whai kia pono ai ā tātau kōrero ki a tātau anō e kotahi ai te ahu whakamua atu. Heoi ka noho mā ngā kaupapa a ngā hapori me ngā iwi i ngā rohe e whai wāhi ai a Aotearoa ki te marae kōrero nei.

## Me pēhea e whai wāhi ai koe ki te *Terenga Waka o Tuia 250*

Ko te matua o te kaupapa nei ko *Te Terenga Waka o Tuia 250* atu i 26 o Mahuru ki te 22 o Hakihea i tēnei tau. E ono ngā waka o te kahupapa nei:

- E rua ngā waka hourua – ko Ngahiraka Mai Tawhiti me Haunui
- Kotahi te va'a moana – ko Fa'afaite (nō Tahiti)
- Kotahi te Kaipuke mō te Rangatahi - ko Spirit of New Zealand
- Kotahi te Kaipuke o te Taitokerau ko R. Tucker Thompson
- Ko te kaipuke HMB Endeavour (te tuarua)

Ka torotoro haere te *Kahupapa Waka o Tuia 250* nei ki ētahi wāhi whaikōrero, whaimana o Aotearoa.

Kāti, ko te mahi a ngā waka nei he whakawātea tūranga mō te tangata hei kaumoana mā runga waka i tētahi o ngā ara terenga kahupapa. Mā te Manatū Taonga e pīkau ngā utu mō ēnei tūranga, ā, e wātea ana kia tono mai ngā kirirarau o Aotearoa, te hunga noho, whai pane uruwhenua hoki.

## Tiro Whānui o te Tono *Tauira Terenga Waka o Tuia 250*

E wātea ana kia tono mai ngā tāngata o Aotearoa kia whai tūranga hei ***Tauira Terenga Waka o Tuia 250***. Ka whai mōhiotanga whakaterere waka ngā *Tauira Tuia 250* i runga i tētahi o ngā waka o te *Kahupapa Waka o Tuia 250*. E 450 ngā tūranga ***Tauira*** e wātea ana (he tūranga i runga waka mō tētahi o ngā ara terenga) mō ngā tāngata o Aotearoa puta noa i te motu. 230 o ēnei e rāhuitia ana mō ngā *Tauira* kura tuarua, 220 mō te iwi whānui o Aotearoa 16 tau, pakeke atu.

E whai muri nei ko ngā kōrero hei āwhina i ngā tāngata o Aotearoa ki te tono mō tētahi o ngā tūranga *Tauira 250*.

## Ritenga Kōwhiri

E wātea ana ngā tūranga *Tauira Tuia 250* mō ngā kirirarau katoa o Aotearoa me te hunga noho 16 tau, pakeke atu. E hōrapa ai te kōwhiringa ki te motu, kua wāwāhia ki ia rohe he nama tūranga *Tauira* mō ngā tāngata ake o aua rohe.

Ka kōwhiria he tūranga *Tauira* mō tētahi o ngā ara terenga mā runga i tētahi o ngā waka, nā reira me tuku e ngā kaitono ngā kōrero e rite ana mō rātou me ō rātou wāteatanga e pai ai ngā whakatau a ngā kaiwhiri. Kei te kaitono te tikanga mēnā e hiahia ana ki te tohu i tētahi waka hei eke māna, engari kei te rahi o ngā tūranga kua whakaritea mō tōna rohe, te rite o te


kaitono mō aua tūranga, te āhua hoki o ētahi atu kaitono o taua rohe, te kōwhiringa whakamutunga.

### Te Terenga Waka

Ka tere ngā waka mai i te **26 o Mahuru ki te 22 o Hakihea**. Ka rerekē ngā rā e maunu ai ko ia waka; mātua wehe mai ngā waka hourua me te va'a moana, ka peka ki Whangaparāoa, ki Anaura anō i te ara ki Tūranganui-a-Kiwa, ka ū atu ki reira ā te **5 o Whiringa-ā-nuku**, ka pōhiritia, ka tū hoki te kaupapa o reira ko *Tuia i Hawaiki Mai*. Ka rā mai ki muri ko ngā kaupuke e toru, tere tōtika ki Tūranganui-a-Kiwa, ū atu ki reira ā te **8 o Whiringa-ā-nuku**, mō te *Kaupapa Whakamaunu o Tuia 250*. Mai i taua wāhi ka tere te *kahupapa waka* ki ēnei wāhi:

- Ūawa
- Wharekāho - Whitianga
- Maraetai; Tāmaki Makaurau
- Whangarei
- Pēwhairangi
- Ōruru
- Waikawa
- Wairau
- Te Whanganui-a-Tara
- Whakaraupō;
- Te Māhia.

He rerekē ko tēnā ara, ko tēnā ara o te terenga, te uaua, te roa – tōna kotahi ki te tekau mā rima rā. Hei āwhina i te kōwhiringa, me whakamōhio mai e ngā kaitono te roa o te wā e tau pai ai rātou ki te moana.



## Te tuku tono

Me pānui e ngā kaitono katoa tēnei tiro whānui kia mārama ai rātou ki te ritenga tono mō ngā tūranga *tauira* o ō rātou ake rohe.

Kātahi me tuku e ngā kaitono he tono mā te whakakī puka i te pā ipurangi o *Tuia 250* – [www.tuia250.nz](http://www.tuia250.nz). Ki te kore e taea ko tēnei, me whakakī mai he kape o te Puka Tono *Tauira Terenga Waka Tuia 250*, kātahi ka tukuna hei PDF, hei whakaahua rānei mā te imēra ki [tuia250.trainees@mch.govt.nz](mailto:tuia250.trainees@mch.govt.nz)

Ki te hiahia te kaitono ki te tuku tono mā te imēra, tuhia mai ki te wāhi ‘Take’ o te imēra kia pēnei te takoto:

Takotoranga: Tono *Tauira Terenga Waka Tuia 250* – Rohe, Tāone, Takiwā rānei, Ingoa

Hei tauira: Tono *Tauira Terenga Waka Tuia 250* – Te Whanganui a-Tara, Porirua, Sarah Rangī

Ki te kore e pēnei te tuhi mai ka raru pea tō tono. Me tuku mai e ngā kaitono he puka tuakiri e rite ana (kei te pā ipurangi o *Tuia 250*, kei te Puka Tono *Tauira Terenga Waka Tuia 250* rānei ngā tohutohu). Me tuku mai ko te puka tono me ngā puka tuakiri anake, kua ko te Tiro Whānui o te Tono *Tauira Terenga Waka Tuia 250*. Kāore e tirohia ngā tono e tae mai i muri i te 5 i te ahiahi, te Rātapu, te 9 o Pipiri.

## Ngā rā nui

**28 o Haratua** – ka wātea ki te tono

**16 o Pipiri** – ka katia ngā tono

**22 o Hōngongoi ki te 1 o Hereturikōkā** – ka whakamōhiotia atu te hua o ngā tono ki ngā kaitono

## Tauākī Tapu

Ka noho tapu ngā kōrero katoa ka tukuna mai e koe ki te Manatū Taonga. Ka tirohia anake aua kōrero hei whakamātautau i tō tono, hei whakapā atu hoki ki a koe, ā, kāore e whākina atu ki tangata kē atu ki te kore e whakaaetia e koe.